



### EDITORIAL

## Ginpapadagmit han mahugaw nga gerra han AFP an pagbagsak ni Duterte

**N**agdeklara na liwat hi Maj. Gen. Pio Diñoso han 8th Infantry Division han bag-o nga dedlayn kontra ha BHB ha Eastern Visayas. Sering niya, mabubungkag an "tulo nga prente gerilya ha ikaduha nga kwarto han 2021," ngan "upat nga prente gerilya antes an katapusan han termino ni Duterte" ha 2022. Kundi sugad han mga deklarasyon han mga nahiuna kan Diñoso, waray ini hingaradtuan kundi kapakyasan.

An natikapintas nga todo-gerra han AFP amo an nagpapanhimuwa han kalugaringon hini nga paghinambog. Nase-ring an AFP nga "pira kagatos na la an ira mangaraway" kundi diri hini hul-os nga mapuyoy an BHB. Natikadugang la an tropa han kaaway ha rehiyon, an pinakabag-o an 226 nga PNP-SAF *commando* nga gindeploy yana nga bulan. Dugang ini ha 18 nga pankombat nga batalyon han AFP-PNP, an pinakadamo ha kasaysayan han rehiyon. Diri mamenos ha 15 nga bungto an mayda nakapokus nga operasyon militar o FMO, bisan ha Southern Leyte, nga deklarado nga "waray na insurhensiya" upod han Leyte ngan Biliran. Ha mga erya nga waray FMO, dirudiretso gihapon an mga operasyon kombat ngan RCSP. Karuyag

pa han kaaway nga magdugang han tropa ngan higamit militar sugad han idro, helikopter, ngan *drone*.

Proyba ini diri han militar nga supe-ryoridad han AFP kundi han unob nga kawaray pulos han kontra-rebolusyunaryo nga gerra. An AFP mas abante an armas, mas dako an badyet, ngan mayda ayuda han imperyalismo nga US. Kundi an BHB, nga ginkokomponer prinsipal han mga kablas nga parag-uma, haros 52 katuig nga padayon nga natindog ngan nakikig-away para ha demokrasya ngan katalwasan. Imposible ini kun diri hira ginsusuportahan han hiluag nga katawhan nga natuod nga pinaagi la han armado nga rebolusyon mapapabagsak an pakuri ngan dunot nga sistema.

Kun waray maperdi han AFP an BHB hadton guti ngan maluya pa ini, asay pa yana nga mas dako na ini, mas hilarum nga nakagamot ha masa, ngan tungod ha grabe nga krisis ha ekonomiya ngan pulitika, mas matambok na an tuna agud papintason an pakig-away kontra ha pakuri ngan pasista nga rehimen Duterte. Ginpapadagmit la han mahugaw nga gerra han AFP an kaperdihan hini, ngan an pagpabagsak kan Duterte. **■**

## FMO ha Samar, gin-aatuhan han BHB

DIRUDIRETSO NGA GIN-AATUHAN han mga yunit han Bagong Hukbong Bayan an haros upat kabulan nga nakapokus nga operasyon militar (FMO) han AFP-PNP ha bawnderi han Northern ngan Western Samar. Hadin Pebrero, diri mamenos ha lima an nahia-gum nga kaswalti han kaaway ha mga aksyon militar han BHB-Rodante Urtal Command (RUC).

Duha nga tropa han PNP-12th Special Action Force an napatay han aktibo nga magdependa an BHB-RUC ha may Brgy. Ginagdanan, San Roque hadton Pebrero 13 dapit alas-6:16 han aga. Kinse minutos an ira baluay han buto antes talwas nga nakaatras an BHB-RUC. Usa kaoras pa waray hunong nga nagpabuto an kaaway ngan duha kabises gumamit han 105mm howitzer.

Kahuman han duha kaadlaw, gin-ambus han BHB-RUC an mga nag-ooperasyon nga tropa han 43rd IB ha Brgy. Cagbigajo, Pam-bujan dapit udto. Tulo kaoras pa nagpabuto an kaaway bisan kun nakaatras na an mga kasama. Unom kabises liwat nanganyon an kaaway. Naghalad naman han kinabuhi hi Ka Spy han BHB-RUC para hini nga ambus.

Usa nga pulis an nasamaran han utro nga magbalyuay han buto an BHB-RUC ngan 2th PNP-SAF ha Brgy. Cuenco, Las Navas hadton Pebrero 19. Sigon ha inisyal nga sumat, naigo ha tuhod hi Patrolman Villanor Dumaguing.

Tikang pa hadton Disyembre 2020 naglalansar han nakapokus nga operasyon militar han 19th IB, 43rd IB ngan 12th PNP-SAF hini nga magkaraknit nga mga bungto. **■**

## Mga "ginpasurender" han AFP, nabalik gihapon ha BHB

GIN-AMIN HAN KUMANDER han 19th IB nga pira ha mga ginpirit han AFP-PNP nga sumurender nabalik gihapon ha pagpultaym ha BHB. Ginhimo ni Lt. Col. Jasper Pecson an pahayag ha kunohay "mass surrender" ha Matuguinao, Western Samar hadton Pebrero 19.

Gin-amin liwat ni Pecson nga hini nga ira ginpasurender, 195 katawo an ira gin-interogar. Tungod ha kahadlok nira ha mga sundalo, napiritan na mag-ebakwet an mga residente ngadto ha bungto. Gin-kakahadlukan liwat nira an mga kriminal ngan magraot nga elemento nga diri man kuno gindadakop han PNP, ngan aada pa ngani kuno ha mismo nga upisina han munisipalidad.

Ginpopokusan han 19th IB ngan han PNP-SAF an nasering nga bungto, partikular an mga barangay han Del Rosario, Ligaya, Carolina, San Roque, Inubod, Rizal, ngan Mahayag, tikang pa hadton Disyembre 2020. ■

## Sakit han baboy, nagsasamwak ha Leyte

Natikasamwak na ha prubinsya han Leyte an African Swine Fever (ASF), usa nga sakit nga nakakapatay han mga inataman nga baboy. Hadton Enero, nagsering an Department of Agriculture (DA)-Region 8 nga nakontrol hini an pagsamwak han ASF hadton tulo pa la nga bungto ha prubinsya an mayda kaso hini. Kundi hadton Pebrero 24, mayda na mga kaso ha Tacloban City, Abuyog, McArthur, Javier, Burauen, La Paz, Tanauan, Pastrana, ngan Palo.


Dako nga destroso an durot han ASF ha mga magbababoy tungod kay ngatanan nga baboy nga natatapanan hini namamatay. Kinahanglan liwat patayon an ngatanan nga inataman nga baboy sakob hin 500 metros nga pali-bot han mga natapanan agud pugngan an pagsamwak han bayrus. Septyembre pa la, maabot 300,000 na an ginpatay nga baboy ha bug-os nga nasud, o 3% han suplay han baboy ha Pilipinas. Ha Leyte, diri mamenos ha 1,600 nga baboy na an ginpatay hadton Enero pa la.

Problema pa han mga paragbaboy an kawaray hin ayuda ha produksyon ngan bayad-danyos tikang ha gubyrerno. Nagtuturudlukay an mga lokal nga gubyrerno, an panrehiyon ngan nasyunal nga mga upisina han DA kun hin-o an magpopondo hini. Samtang, bilyun-bilyon piso na an nalugi han mga paragbaboy.

Apektado liwat han ASF an mga konsumer. Tungod ha pagbagsak han suplay, naghitaas an presyo han karne nga baboy ha merkado ngadto ha P400/kilo. Nagpatok

han *price ceiling* (maksimum nga presyo) han karne an rehimen Duterte kundi waray ini ginhatag nga ayuda ha mga paragbaboy. Napiritan hira nga diri na la magbaligya han karne tungod kay malulugi gihapon hira.

Sugad han ginhimo han DA han bu-magsak an produksyon han bugas, importasyon na liwat an solusyon hini ha kakulang han suplay han karne. Sugad han nahitabo ha mga parag-uma han humay, duro liwat nga malulugi an mga paragbaboy ngan mabagsak an lokal nga produksyon han karne. Matapod an mga konsumer ha imported nga karne nga amo an gintutudlok han mga paragbaboy nga nagdara han ASF ha Pilipinas. ■



## HA KAMATUORAN

### 317,808 nga trabahador

mababaydan hin **P100 nga dugang** nga suhol sakob hin **usa katuig** gamit an **P11.6 bilyon** nga pambayad para ha mga **Sikorsky S70i Black Hawk helicopter** nga ginpalit han rehimen Duterte.



### P11-12/kilo

abereyds nga presyo han baligya nga humay yana nga kat-ani



Reperens: Bantay Bigas, Pebrero 2021